

陽曲縣志

卷之十四

列女列傳

列女列傳

陽曲縣志卷十四

列女之名昉於劉向曹昭重其學蔡姬著其才凡閨範之足爲法鑒者必採之非僅傳貞節也今志以賢媛列首而節孝貞烈次之亦劉向之遺意云

賢媛

北魏

王氏辛少雍妻有德義少雍與從弟懷仁同居懷仁等事

之甚謹閨門禮讓人無間言士大夫以此稱美

府志

唐盧氏狄梁公之堂姨也居午橋南別墅盧有一子狄曰某今爲相表弟有何所欲願悉圖之婦曰老身止有此子不

欲其事女主狄慚而退

戴志

明貞髦君傅徵君山之母也容城孫鍾元誌其墓曰姓陳氏父勗忻州諸生十七歲歸檀孟先生爲傅氏婦舅叅議公御家頗嚴諸婦中獨以勤慎著生子三長庚諸生先卒次卽山甲申後以道人稱三止舊太學生甲申之變山棄家而旅隨所寓奉母往母絕不以舊業介意沙蓬苦苣怡然安之甲午山以蜚語下獄禍且不測從山遊者僉議申救貞髦君曰道人兒應有今日事卽死亦分不必救也逾年山出獄見母母不甚悲亦不甚喜頷之而已嗚乎此母之

達識何如也貞髦君內美純備不能詳述述此一節亦可
以告後世矣壽至八十四歲卒於松莊之僑舍其曰貞髦
君山之友蹟其行與年私稱之者也

截錄孫傳
新增

李氏推官韓彰繼妻先娶張氏遺子紹李生子紘氏遇紹有
恩衣服飲食常加於紘紘愠氏叱曰爾有母而彼無母爾
欲使我作蘆絮婦耶紘登甲第兩典州郡咸謂賢母之報
云

戴志

國朝梁氏蕭全妻二十三歲無子夫久出無音耗家僅薄田
十畝氏資鍼黹養孀姑繼聞其夫客死於外暗泣不敢告

陽曲縣志 卷十四
姑知或慰之氏輒變容姑歿鬻衣質地而葬

徐氏北留村裴挺妻十七適裴舅日在醉鄉氏事之惟謹舅歿挺兄弟皆外出而嫂亦別居惟氏以事姑爲任子有腿疾治甫愈而嫂歿遺孤三歲方勤撫字而姑又病艱窘萬狀日夜勤女紅奉姑撫子與姪不少怠姑歿夫返旋偕子外出父子俱歿於塞外一慟幾絕念幼姪尙延宗祀强起撫字不衰

彭氏東黃水鄭嘉謨妻繼姑性嚴厲事之彌謹姑病三載侍奉有常所居西堡有井族姓修屋塞之幾成訟氏勸夫於

己地穿井堡人得汲而訟息又有族將鬻妻者給以錢粟得完聚子祥書課徒堡中戒曰誤人子弟太損德盡心課徒卽汝之孝也

劉氏知府馮思忠妻孝謹端莊姑吳氏病篤囑氏曰我病不起遺此兩月兒善撫之氏泣諾姑卒氏抱幼叔自乳哺而以己女出就外乳卒撫之成立叔名思賢今六十九歲猶常念其恩誼爲之流涕云又充氏思忠妾思忠患奇疾醫曰藥非人肉不效充聞之潛割股肉和藥以進值盛夏數日刀口腐臭逼人劉覺急醫之言於思忠曰有妾如是我

不及也忠歿充與劉並矢貞守卒年三十四妻妾如劉充亦足風已

王氏馬家坡馬殿妻年二十二歲家貧無子夫遠出久無音耗事重慶以婦代子姑歿遺二子俱幼氏夙夜勤女紅以資撫育及長皆力營與之成室兩叔亦事嫂如母家門雍穆歷五十餘年如一日閭里重之卒年七十六歲而夫終未歸賣志以歿亦足悲夫

阮氏盧芳妻十五歸盧歸之日六禮甫成而芳卽遠遁家人覓之不得嗣聞其披剃於京西之檀柘寺卒不歸氏事翁

姑恪盡婦道終身矢志靡他卒年六十八歲

附大年七人夫坤道柔順利貞而厚德乃可載福謂非

熙朝之人瑞與

彭氏狄村楊國孝妻武進士廷詔之曾祖母生於明天啓二年康熙五十六年慶百歲五十八年得元孫壽享百有二歲

旌表建坊

任氏庠生楊芳聲妻廷詔祖母亦壽躋百齡姑媳同登大年

任氏並詳節孝

張氏王汝霖妻九十五歲親見五世

王氏馬家坡馬述丕妻親見五世

阮氏田潤妻八十四歲親見五世

石氏小棗溝趙珩妻七十九歲得元孫家門雍睦五世一堂

賈氏石慎修妻夫九十餘卒氏年九十四歲四世一堂

舊志節烈元三人明四十九人新增一人

元申氏安氏李宏益妻至正中賊陷冀寧申語宏益曰君速去勿以我爲累言訖投井死又娶安氏居二載宏益卒安泣曰夫死我生何益膏櫛自縊於柩旁

張氏王思忠妻早寡亦以死從夫事聞褒表

府志

明王氏太原左衛百戶李雄妻洪武間雄歿於陣氏年十九聞訃哀號欲絕撫孤守節歷五十餘年士大夫表其門曰

忠節

楊氏賈文遠妻夫亡仰事俯育志行無玷洪武年旌表 郝

氏董榮妻 馮氏董三漢妻皆少寡守節宣德年旌表

朱氏胡源妻奉姑撫子守節二十五年正統年旌表

趙氏郡庠生蘭景昌妻字慧寶太原右衛小旗旺女年十八夫以疾卒氏乃盡斂其妝奩於姑曰妾守空房恐啓穿窬

心復給其母回家爲夫辦祭母諾氏伺間縊於棺側殯日雙柩並行見者泣下成化初有司上其事旌表曰貞烈復其家

鄭氏百戶陳義妻字淑英頗讀書幼聞父談節孝事輒曰是在人自盡耳長適義無何義出戍卒於邊喪歸啓棺浴而殮之撫尸慟絕數四勺水不入口者七日曰吾前已約吾夫矣遂縊於室與上趙氏邑侍郎張頤立傳

羅氏千戶張斌妾生子鑑甫八月斌卒清操自勵訓鑑有成董氏鄒鑑妻名貞生子溥而鑑亡四日不食決志殉夫所親

勸之曰從夫義也其如舅姑藐孤何氏頷之既殯終身蔬
素紡績溥長娶婦王氏生子慶未期溥亡王年二十一守
節如姑士大夫旌曰雙節

王氏張永相妻少師恭襄公妹少聰慧好讀書及笄適相恂
恂類貧家女未抱子勸相納妾韓氏生子多疾王撫之五
歲尙口哺相亡延師教之王熟於尙書每口授以廣其業
脫簪珥爲市書御史魏希相爲文頌其賢

武氏郡庠生王相妻相亡三子俱幼忍死撫孤歷五十餘年
子佐封河南道御史孫立賢太僕寺卿曾孫元雅遵化巡

撫子孫繩繩門祚熾昌

臧氏張鈇妻年二十三夫亡自縊以殉

鈇省郡志作鐵

王氏牛氏郭憲妻嘉靖間北兵入犯王被掠不屈遂遇害繼娶牛氏憲亡散遺資於親族不食十有四日而死

鄭氏王天倫妻年二十三夫亡縞素撫孤節操自矢時弟妻朱氏亦孀居共處五十年事姑奉祭無違禮巡撫黃疏表其門曰雙節聯芳

彭氏庠生郭應元妻通列女傳工細書夫亡無子苦節以終劉氏張棟妻年二十夫亡苦守遺子登雲登選撫訓成立

施氏千戶潘政妻夫亡年少子幼甘貧守志子姪四世同居
皆氏撫訓孫高登進士仕至布政司叅議

王氏襲千戶潘潤妻年十九夫亡讓厚產甘淡泊孀居三十
餘年題請旌表

郭氏蘭州知州李鈞妻年二十夫亡抱孤天資泣曰死易立
孤難忍死茹苦撫孤成立天資婦張氏甫妊而天資亡遺
孫化龍甫歲張亦亡氏百方呵護卒撫幼孫有成題請旌
表

杜氏朱知鯤妻通判纘字女家貧無子年十九夫亡喪不能

舉盡鬻衣物以殮潛自縊姑覺救免孀居三十餘載女紅養姑官給匾旌表

趙氏錢益謙妻夫亡子在襁女幼舅姑獨幾絕氏孝親撫孤教子利用冲齡食餼學使獎之利用後以歲貢授藍田縣丞

張氏庠生劉一龍妻年二十三夫亡子芝在襁孀居三十餘年食貧課子艱苦萬狀芝讀書樹立以選貢官彰德通判趙氏羅江四妻夫逝撫二子成立孫萬象入學守節五十餘年八十餘歲卒

張氏秦世登妻年十九夫亡家貧守節六十餘年邑令宋文康題請旌表 吳氏秦世賢妻夫亡誓不二天貧無以給通儒書及內典課甥與姪苦守年八十六終

胡氏陝西布理問李維翰妻翰卒於官氏扶櫬歸有遺腹祝曰夫弟四俱絕願天畀一子以延宗祀果得男芳桂氏課之卒登賢書孫丕承廩生邑令宋文康表其閭邑舉人尙時彥立傳

李氏郡庠生傅襄妻太原孝廉中馥女年十九無子襄遘疾氏廢寢食期以死殉及襄卒婦獨臥棺下無所怖但食杏

子衆覺急解以藥氏閉口不得進嚮重堂俯伏日暮竟死
時當盛夏越三日始殮而顏色如生青蠅不集若有鬼神
陰相之者邑令范表其節昭餘戴廷枋立傳

截錄
本傳

陳氏叅將朱國昌妻早寡食貧守志課子萬壽領鄉薦

張氏藁城令劉世遠妻夫卒扶櫬歸守節撫三子成立請旌
高氏崔九德妻嫠居四十六載課子入邑庠請旌

劉氏張彥明妻早寡貧無子女其兄勸改適氏厲聲曰本望
成我志而反出此言耶遂與兄絕歲屢歉益窘日號泣隣
媼微諷之氏曰志豈有他恨不與夫同斃耳年八十餘終